

Date – 24/02/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 16th Finance Commission member ten vawiin khan Zoram Medical College & Hospital, Falkawn- an tlawh.
- Ni thum awh tur Aizawl Day lawmna chu vawiin khan Aizawl Mayor Pu Lalrinenga'n Aizawl Sipai Lammual ah a hawng.
- Prime Minister Narendra Modia chuan Assam chu hmasawnna tura theihna tam tak nei leh South East Asia leh India inkalpawhna tur chhuahka pawimawh tak a ni a ti.
- Delhi Assembly thutkhawm neih mekah AAP MLA 21 te chu session neih chhung atan suspend an ni.

<><><>

FINANCE COMMISSION

16th Finance Commission member ten vawiin khan Zoram Medical College & Hospital, Falkawn-a mi chu an tlawh a, hetah hian Health & Family Welfare Minister Pi Lalrinpuii leh Secretary Pi Sangchhin Chinzah bakah ZMCH hotuten an lo dawngsawng a, ZMCH hmasawnna tur hrang hrang an sawi ho.

ZMCH Academic Block a Council Roomah inkawmhona ah hian Director Dr John Zohmingthanga'n presentation pe in ZMCH lo indin tan dan atanga an thlen chin te leh hmasawnna tur

la awm leh an mamawh chi hrang hrangte a tarlang a, Health Minister Pi Lalrinpuii pawhin 16th Finance Commission chungah beiseina sang tak an neih thu a sawi a, ZMCH bakah Health & Family Welfare Department kaihhnawih thil pawimawh tak tak an hnena an thlente chu Mizoram hmasawnna atana pawimawh ber berte an nih avanga ngaih pawimawh sak tur leh a tihhlawhtlin dan kawng ngaihtuahsak turin a ngen bawk a ni.

16th Finance Commission member te hian ZMCH fang kualin OPD, Laboratory leh Department hrang hrang an tlawh a, ZMCH hotute pawhin an dinhmun leh hmasawn theihna tur la awm ang angte a hmunah an hrilfiah a ni.

ZMCH an tlawh hnu hian 16th Finance Commission memberte chuan Falkawn Bharat Nirman Rajeev Gandhi Sewa Kendra Hall-ah Falkawn Village Council hotute an kawm a, hetah hian 16th Finance Commission Chairman Dr. Arvind Panagariya chuan hovin LAD Director Pu Chauhnuna leh Falkawn Village Council member ten an lo dawngsawng a ni.

Falkawn Village Council hotute chuan Mizorama Village Council 800 chuang awm zingah an hun chep tak kara tlawh tura anni an rawn thlang chu Commission chungah an lawmthu an sawi a, Village Council inrelbawlina kalphungte sawifiain an lo tawnhriat tawh atangin Mizoram pum huapa Village Councilte mamawh leh hmasawnna tur bakah hmalak dan thar tur atana tha ni a an hriatte 16th Finance Commission hnenah hian an thlen a, sawihona hun tha takin an hmang bawk a ni.

<><><>

AIZAWL DAY

Ni thum awh tur Aizawl Day lawmna chu vawiin khan Aizawl Mayor Pu Lalrinenga'n Aizawl Sipai Lammual ah a hawng.

Pu Lalrinenga chuan Aizawl khawpui chu ni 25 February kum 1890 atang khan mei mit lova luah lum nia chhinchhiah a ni ati a, Chumi champha chu Aizawl Day chu niin; Aizawl khawpui din cham chu Aizawl Mihlun Thlahten an lo lawm thin thu a sawia, kum 2023 atang khan Aizawl Municipal Corporation kutah Aizawl Day lawmna chu tla in AMC hmahruaina a lawm thin a nih tak thu Pu Lalrinenga chuan a sawi a ni.

AMC chuan Aizawl Day lawmna pualin thalai infiammite tan Mayors' Cup huaihawt thin in, kumin ah hian Basketball inelna buatsaih a ni a, Ward 14 aiawh Khatla South Local Council ten Mayors' Cup – Trophy leh pawisa fai Nuai 1 an hawn tel.

Aizawl Day pual hian intihsiakna hrang hrang siam niin, Quiz inelna te, Faina lama thawk tha chawimawina te, Hotel leh Restaurant fai thlan chhuah te, AMC chungchang documentary tawi insiamsiak chawimawina te hlan an ni a. College Quiz inelnaah Govt. Mizoram Law College te chu pakhatna niin citation, momento leh pawisa fai cheng Sing Sarih an dawng a, Hotel fai lawmman dawngtu Ransom Hotel – Thuampui Vengthar te chuan Citation leh pawisa fai cheng singkhat an dawng a, Restaurant fai lawmman dawngtu Donum Dei, Dawrpui Vengthar ten citation leh pawisa fai cheng sang nga an dawng a, AMC chungchang documentary tawi insiamsiakah FC Lalchhuanawma chu pakhatna niin citation leh pawisa fai cheng singruk a dawng tel a ni.

Kan corr report lo ngaithla ang.

<><><>

LENGPUI AIRPORT FORUM

Lengpui Airport Forum chuan Mizoram sorkar in Lengpui Airport chu Indian Air Force kuta a hlan chuan, hnam rohlu, hruaitu hmasaten harsa taka an lo sual chhuah chu Mizoram in a chan kumkhua tawh dawn a, lak kir leh theih a ni tawh dawn lo anti.

Lengpui Airport Indian Air Force kuta Hlan a Him Lo tih lehkhabu-te an siam, vawiina an tlangzarhna kaihruaitu Lengpui Airport Forum hruaitu Pu Lalthlamuana Ralte chuan a sawi a, Mizoram sorkarin IAF kuta hlan ngei a tum avang leh IAF hnena hlanna tur ti fel tura ruat Working Committee chu February ral hma ngeia Draft Agreement ti fel tura tih an nih thu a sawi a, sum harsatna avanga IAF hnenah Lengpui Airport hlan a nih chuan hnam tan pawithui tak a sawi dawn a ni an ti.

Lengpui Airport Forum chuan Airport Authority of India kuta Lengpui Airport hlan chu an duh dan ber a nih thu he hun ah hian an sawi a, kumin January 24-a Aizawl Press Club-a chanchinbumite an kawm na ah, 'Lengpui Airport Indian Air Force Hnen A Hlan Tum Chungchang tih lehkhabu-te (booklet) anlo tlangzarh tawh bawk a.

Lengpui Airport Forum chuan Airport-a hmun pawimawh lai ber pahnih - thlawhtheihna lut leh chhuak zawng zawng thununna hmunpui Air Traffic Control (ATC) Tower leh thlawhtheihna tumkawng (runway) te Mizoram sorkarin IAF kuta a puma a hlan chuan Mizoram sorkar chuan chung airport ti airport-tu ber ah thuneihna a nei zui thei tawh dawn lo a ni an ti.

Airport inpui (terminal building) atanga thlira tumkawng lehlam pang a airport ram chin zawng chu IAF in an chang dawn a, Mizoram sorkar tan inrawlh ngaihna a awm tawh dawn lo a ni anti a. Mizoram sorkar chuan airport inpui -te, airport venhimna (security) leh thlawhtheihna chuan man hralhna ah te chauh thu an neih tawh tur thu leh, thlawhtheihna lut leh chhuak kaihnawih lo chinah chiah Mizoram Sorkar in thu a nei tawh dawn a, IAF kuta Lengpui Airport pek anih chuan Mizoram mamawh a phuhru pha dawn lo a, Mizoram tan thil pawl tak a thlen thei dawn anti bawh.

<><><>

DIG NR

State chhunga Police Station hrang hrang atangin Phone bo chhui chhuah 875 a awm a, Ministry of Communication hnuiaia Department of Telecommunications-in a siam CEIR Portal hmangin Mobile Phone rukbo/tihbo 110 chhuichhuah a ni tawh bawh.

Vawiin khan DIG (NR) Pu C.Lalthanmawia chuan Aizawl SP Office chei that a hawng a. Hetah hian tunhnaia Aizawl District-a Mobile Phone rukbo/tihbo CEIR Portal hmanga chhuichhuah thenkhat te chu a neitute kutah a hlan nghal a ni.

Mobile Phone rukbo hi Police Station-ah complaint dawn nasat leh thil thleng hluar em em a ni a, hemi avang hian ngawrh taka chhuichhuah hna kalpui thin a n a, Kum 2023 chhungin- 559, Kum 2024 chhungin-299 leh kumin February thla thleng khan -17 chhuichhuah a ni. Police Station hrang hrang atanga Phone bo chhui chhuah 875 bakah hian Ministry of Communication hnuiaia Department of Telecommunications-in a siam CEIR Portal hmangin Mobile Phone rukbo/tihbo 110 chhuichhuah a ni tawh bawh. Mobile Phone bo chhui hna hi ngawrh taka kalpui mek zel a ni a. Hengte hi a neitute hnenah pek kir zel a ni.

He hun hmanna-ah hian Pu C.Lalthanmawia chuan Aizawl SP Office hnuiaia CEIR Portal enkawltu leh phone chhuichhuahna kawnga hma latu ber Constable Lalchhuansanga Khawlhling,

Crime Branch, SP Office, Aizawl hnenah lawmman a hlan nghal bawk.



NATIONAL SEMINAR ON PACKAGING

National Seminar on Packaging, Export Promotion and Digital Marketing chu vawiin khan Aijal Club ah neih a ni a, hetah hian Mizorama thlai tharchhuah hrang hrang sawngbawl dan leh hmasawna hrang hrang sawiho a ni.

Branch Micro Small and Medium Enterprises (MSME) buatsaih vawiina hun hmanah hian Commerce & Industries Department Director Pi Maria CT Zuali chuan Mizorama thlai thar chhuah te leh an siam chhuah tam tak chu pack na mumal an nei lo a ti a, Nimbu sawr chhuah chu bur dang ah thun in zawrh ani mai thin tih sawiin food processing lama hmasawn tur chuan thangthar thiamna sang tak tak nei, hmunpui zawk dawr thiam an ngai a ti a, Mizorama thlai thar chhuah chu pack-na tha a awm loh avangin la thawrchhuah theih a ni lo a, Mizoramah chuan lakluh lam hawi zela a la kal avangin hlawkna an la tel thei rihlo tih a sawi.

National Seminar ah hian mi 150 chuang tel in, helam a mi thiam bik te leh Self Help Group hrang hrang, MSME entrepreneur-te leh Mizoram University Student te an tel a. He hun ah hian Indian Institute of Packaging Government e-Marketplace (GeM)-a mi thiam leh helam a mithiam bik ten kalkhawm te chu training an pe nghal bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM

Prime Minister Narendra Modia chuan Assam chu hmasawnna tura theihna tam tak nei leh South East Asia leh India inkalpawhna tur chhuahka pawimawh tak a ni a ti. Vawiina Advantage Assam 2.0 ah he thu hi sawiin Pu Modia chuan Assam chu India khawchhak lamah thilsiam chhuahna hmunpui ber ala ni dawn a ti a. Industry lama thuneitute chu he theihna hi hmang tangkai turin a ngen nghal a ni.

Prime Minister Narendra Modia chuan khawvel dinhmun inthlak nasa tak karah khawvel mithiamten India chuan chak takin hma a sawn dawn a ti. Prime Minister chuan India chuan pen khat zelin hma asawn tih sawiin kum 25 chhung thlir lawk chungin hmalakna lian tak tak a nei a ti a. Khawvelin India inrelbawlina chu a ring ngam chho zel tih sawiin insiamthatna kalpui reng a ni a, thalai tam takin thiam thil an nei chho zel a, mi naran chhungkuate pawhin chak takin hma an sawn mek zel a ni a ti bawk.

Ni 2 awh Summit ah hian ministerial session pasarih leh thematic sessioni 14 neih tur a ni ang.

<><><>

ARMY CHIEF

France tlawha cham mek Chief of Army Staff General Upendra Dwivedi chuan vawiin khan French Army Chief General Pierre Schill a kawm. Sipai lal pahnihte hian ram pahnih ten ralthuam lama an thawhdunna te sawidunin hun lo kal zel tura sipaiten inzawmna tha an neih theih dan tur an sawi hoa. Khawvel remna muanna chungchang leh venhimna lam te an sawidun a ni.

<><><>

DELHI

Delhi Assembly thutkhawm neih mekah AAP MLA 21 te chu session neih chhung atan suspend an ni. Lt. Governor Vinai Kumar Saxena chuan an chet dan mawilo tak avangin AAP MLA te suspend an ni a ti a. Delhi Assembly inkhawmah hian tukin khan Lt.Governor Vinay Kumar Saxena chuan thu a sawi a. LG thusawi lai hian AAP MLA te chuan Dr. B R Ambedkar-a leh Bhagat Singh-a lim Delhi Chief Minster Rekha Gupta i chamber atanga laksawn anih duhlohin nasa takin house chhung an au buai a. Hetianga hun rei tak an awm hnuah Speaker Vijender Gupta chuan a suspend zui ta a ni.

Delhi Assembly thutkhawmah hian nimin khan Vijender Gupta chu Delhi Assembly Speaker atan thlan a nia sawrkar thar
siam anih hnuah Delhi Assembly thutkhawm hmasa ber neih a ni
a. Nimin vek khan Chief Minister Rekha Gupta leh a cabinet
member Pravesh Sahib Singh, Ashish Sood, Manjinder Singh
Sirsa, Kapil Mishra, Ravindra Indraj Singh leh Pankaj Singh te
leh MLA thlan tharte chuan rinawmna thutiam lain MLA atan
lakluh an ni.

Delhi Assembly inthlan neih zawh takah khan BJP chuan
seat 70 ah seat 48 ah hnehan an chang a. Aam Aapni Party chuan
seat 22 an la thung a ni.

<><><>